

四庫全書

史部

欽定四庫全書

史部

翰林記卷一至五

詳校官太常寺少卿臣陳桂森

編修臣程嘉謨覆勘

總校官原任中允臣王燕緒

校對官編修臣王嘉曾

謄錄監生臣湯安泰

欽定四庫全書

史部十二

翰林記

職官類一官制之屬

提要

臣等謹案翰林記二十卷原本不著撰人名氏專載有明一代翰林掌故始自洪武迄於正德嘉靖間每事各有標目凡二百二十六條本末賅具首尾貫穿叙次頗為詳悉如所紀殿閣卿寺轉銜與明會典諸書互有同異

又會議繕寫諸條制度甚詳均足以備考核
其七十八兩卷具列館閣題名尤足以見
一代人材升降之概案明史藝文志載黃佐
有翰林記二十卷而廖道南殿閣詞林記序
有與秦泉黃佐纂翰林雜記之語則是書為
出佐手無疑蓋道南與佐同年進士又同在
詞垣故九卷以後多採佐書以足成之而以
此本互相檢核則其文不盡相合蓋道南又

有所點竄惟此為佐原本較為完贍以繼李
肇程俱陳騷王士點諸人所作而唐宋以來
詞林故事乃畧備矣佐字才伯香山人正德
辛巳進士改庶吉士授編修歷官詹事府少
詹事謚文裕事蹟具明史文苑傳所著有樂
典諸書俱別著錄云乾隆四十三年九月恭
校上

總纂官臣紀昀臣陸錫熊臣孫士毅

總校官臣陸費墀

欽定四庫全書

翰林記卷一

明 黃佐 撰

官制因革

聖祖高皇帝定天下之初首闡人文建翰林院吳
元年五月己亥設本院學士正三品侍講學士正
四品直學士正五品修撰典簿正七品編修正八
品洪武二年正月戊申定本院學士承旨正三品
學士從三品侍講學士正四品侍讀學士從四品

直學士正五品典簿正七品屬官待制從五品修
撰正六品應奉正七品編修正八品典籍從八品
九年閏九月癸巳詔定百官品級承旨與六部尚
書俱正三品學士從三品侍講學士從四品十三年
八月己卯增設檢閱從九品十四年五月癸未改正
五品衙門設學士一人侍講學士二人侍讀學士二
人孔目一人屬官侍講二人侍讀二人五經博士五
人典籍二人侍書二人待詔六人史官修撰三人編

修四人檢討四人革承旨直學士待制應奉檢閱典簿
十八年三月丁丑命吏部定正官學士一人正五品侍
讀學士侍講學士各二人從五品首領官孔目一人未
入流屬官侍讀侍講各二人正六品五經博士五人正
八品典籍二人從八品侍書二人正九品待詔六人從
九品史官修撰三人從六品編修四人正七品檢討四
人從七品又定華蓋殿武英殿文華殿文淵閣東閣設
大學士各一人俱正五品班在本院學士上其後簡用

取自上裁官無定員而侍讀先侍講則始於此革除年間更易官制仍設正官學士承旨一員在學士之上改侍讀學士侍講學士俱為文學博士設文翰文史二館文翰館以居侍讀侍講侍書五經博士典籍待詔其侍書陞正七品文史館以居修撰編修檢討改孔目為典簿創置典簿廳而革中書舍人改為侍書以隸翰林又增設文淵閣待詔及拾遺補闕等官永樂初皆復舊制即洪武十八年所定者也尋命編修等官於文淵閣參

預機務謂之內閣漸陞至學士及詹事府諸職洪熙元年以輔導任重加陞至師保及尚書侍郎卿使仍兼學士大學士自後因之或止以待讀等官入預閣事其入閣者雖登穹秩朝旨公移止稱翰林院焉永樂七年以順天府為北京本院官扈從者稱行在翰林院後定北京為京師遂革行在之稱既建今衙門遂以舊署之在留都者為南京翰林院其南京翰林院止設學士一員掌之遇有員缺從內閣推舉其後侍講以上官皆得往掌院事

仍設孔目一人掌文案若修撰等官或因事始添設焉

列銜

凡列銜學士正五品初授奉議大夫陞授奉政大夫勲
曰修正庶尹侍讀學士侍講學士從五品初授奉訓大
夫陞授奉直大夫勲曰協正庶尹侍讀侍講正六品初
授承直郎陞授承德郎修撰從六品初授承務郎陞授
儒林郎編修正七品初授承事郎陞授文林郎檢討從
七品初授從仕郎陞授徵仕郎五經博士正八品初授

迪功郎陞授修職郎典籍從八品初授迪功佐郎陞授
修職佐郎待書正九品初授將仕郎陞授登仕郎待詔
從九品初授將仕佐郎陞授登仕佐郎凡給授之時本
院行吏部該司開報奏聞每僉押卷啓止書職名以品
級為次序惟纂修及進呈書籍試錄等始書散官勲階
凡書必繫於職名之下者以所職乃宸翰國史示有尊
也若以他職兼本院官則否

職掌

學士之職凡贊翊皇猷敷敘人文論思獻納修纂制誥書翰等事無所不掌侍讀學士之職凡遇上習讀經史則侍左右以脩顧問帥其屬以從侍講學士之職凡遇上講究經史亦如之侍讀侍講視侍讀學士侍講學士凡入侍其職亦如之五經博士之職掌易者一人掌書者一人掌詩者一人掌春秋者一人掌禮記者一人人各專門明經同異得失究其指歸以脩講讀典籍之職掌四庫書籍守局鑰以伺上命侍書之職明習六書之

法凡遇上習書則侍左右以備考訂點畫音聲待詔之職凡遇上宣問文義以備呼召編摩謄寫等事亦如之史官之職修撰掌撰述編修掌纂輯檢討掌檢閱凡史事俾專掌焉孔目以首領為職掌言語趨走會計簿書之事竊惟國家置本院以來官不必備以待儒學之臣必如所謂明仁義禮樂通古今治亂文章議論可以決疑定策論道經邦者始可以處之故洪武永樂宣德間雖待詔孔目不輕授人凡居是職者咸知自重若遽謂官

雖有異名其實無異職認認焉而有出位之圖殊失聖祖命官之意也若乃國史不別置院者嘗攷周官掌王之八柄之法以詔王治凡命諸侯及孤卿大夫則策命之丘濬曰八柄詔於冢宰內史復掌以詔王蓋史官公論之所出爵祿廢置殺生予奪之柄有所不公直以筆之吳澂謂內史為翰林之職蓋以命諸侯大夫公卿則策命之猶今學士之掌制詔也然謂之史乃掌文書贊治之名今制併史館於翰林其亦此意歟然則聖祖命

官之意正與成周姬隆非徒遠過唐宋而已

詹事府

洪武初建大本堂延名儒以教皇太子親王此東宮輔導之始也後乃設東宮官屬有同知詹事院事副詹事左右詹事詹事丞左右率府使副使同知左右率府事諭德贊善文學中舍正字侍正洗馬庶子等官皆以勲舊大臣兼之不別設府僚又改贊善為贊善大夫設贊讀洪武三年十二月禮部尚書陶凱請選人專任東宮

官屬罷兼領者庶於輔導有所責成上諭以父子一體君臣一心之意遂止十年置通事司令司丞十四年三月丁未設左右司直郎十五年設左右二春坊又設司經局二十二年置詹事院以統屬之二十四年七月丁未改院為府定設詹事一人正三品少詹事二人正四品丞二人正六品首領官主簿一人從七品錄事二人正九品二十九年十一月壬戌增設屬官通事舍人二人從九品其堂上官與本院官互兼職事而凡講讀纂

修考試等事皆與本院同坊局雖各有印然事則詹事府統之南京詹事府今不設官止設主簿一員蓋詹之為義省也給也謂省給太子之家也詹事之職於內外衆務無所不掌少詹事則貳之丞則掌文書以贊之通事舍人掌通謁賓贊禁令之事主簿掌勾稽錄事掌傳遞云

左右春坊

洪武初置春坊以為東宮輔道侍從之臣官無定員十

五年四月丙申更定春坊為左右春坊置左春坊大學士一人正五品左庶子一人正五品左諭德一人從五品左中允二人正六品左贊善二人左司直郎二人俱從六品右春坊同二十九年十一月壬戌增設左春坊左清紀郎一人從八品左司諫二人從九品右春坊同亦與本院互兼職事蓋二坊之設猶館閣也大學士綜勸學輔德文翰記注之事庶子掌宮中并諸王之適子及支庶版籍行則負璽護駕拜則左右扶掖之諭德掌

侍從贊諭中允掌侍從禮儀駁正啓奏并監藥理刑贊
善掌侍從翊養司直掌彈劾繩糾皆漢唐以來舊制清
紀掌伺察司諫掌諍過失其設也則自本朝始

司經局

洪武十五年四月丙申置司經局設洗馬二人校書二
人正字二人二十三年六月命定司經局隸禮部考唐
制言太子司經局洗馬從五品校書正九品正字從九
品其餘職官祿各有差本朝祿增多於唐宜從裁減詔

自洗馬而下官秩依唐制其俸祿則從本朝二十四年七月丁未定司經局官品秩俱仍其舊按典經局始置自南梁其後隨改司經局唐為桂坊洗馬洗之言先也太子出則前驅導威儀也掌圖籍經史之事校書掌雙校經籍正字掌刊正文字與本院互兼職事正字或中書科兼之

御製誥詞

國初百官除授各有誥勅循宋制也吳元年授翰林侍

講學士朱升制有曰備顧問於內廷叅密命於翰苑又
曰議禮作樂郊廟所資脩已及人國家所尚擢登玉署
侍講彤闈鳳池兼掌於絲綸麟史仍叅於筆削地天交
泰有資翊贊之功雲漢昭回共致文明之治洪武元年
正月庚子授翰林學士陶安誥有曰國家之立必有一
心之臣尊戴匡輔用能張其紀綱植其表儀正其名位
善其辭命基圖以大國家以安又曰開翰苑以崇文治
立學士以冠儒英重道尊賢莫先於爾是用擢居宥密

俾職論思茲特賜以寵章用昭國典尚其勤於獻納贊
我皇猷綜理人文以臻至治其眷注隆重如此嘗攷翰
林之名昉於揚雄所為賦學士大夫亦漢人稱謂之常
爾雖唐人始以命官所謂待詔供奉北門學士與學士
院亦惟以言語文字為職未見其為國家輕重也宋元
因之至我朝而任益崇凡議禮制度考文之大柄一以
付之論道經邦之輔由此其選而政之樞要史之權衡
皆所綜焉二誥命詞有足徵者矣又按永樂末仁宗即

位華蓋殿大學士楊士奇等進陞少保本院以士奇等所授誥進呈上取筆親增二語曰勿謂崇高而難入勿以有所從違而或怠顧士奇等曰此實朕心卿其勉之士奇對曰聖德能容臣等敢不勉昔富弼有言願不以同異為喜怒不以喜怒為用舍成湯改過不吝所以為聖人願陛下常以古人為法於戲觀於此則上下之交真若元首股肱相須而成一體者又聖子神孫萬世之所當鑑也

御製箴

宣宗章皇帝宣德七年六月賜御制翰林院箴其文曰
廷有司言自周則然後世襲用愈密而重策命所出講
學所資機務之嚴于度于洛代有賢哲博聞明識克勵
翼之用光厥職洛爾儒臣朝夕左右必端乃志必慎乃
守啓沃之言惟義與仁堯舜之道鄒孟以陳詞尚典實
浮薄是戒謀議所屬出筵于外心存大公罔役于私昔
人四禁汝惟勵之獻納論思以匡以益以匹前休欽哉

無數於戲聖言嘉彰萬世守官者之所敬遵也今揭於院之後堂朱髹榜字用金塗之

公署

公署蓋為聽事而設國朝建官以本院為近侍衙門故公署雖在外而僚屬相聚恒在館閣洪武初建翰林院於皇城內學士而下晚朝即宿其中扁之曰詞林其後兼考唐宋制度詔改建於皇城東南宗人府之後詹事府居其次洪武二十六年十月興工至二十七年十月

辛巳告成詔皆賜宴落之今為南京翰林院永樂中行
在本院官仍在禁內供奉不別立公署正統七年八月
有詔復建於京師長安左門外玉河西岸鑾駕庫之右
而東岸則為詹事府焉命中官陳姓者督工踰年落成
正堂三間中設大學士侍讀學士侍講學士公座左為
史官堂右為講讀堂首領官房在儀門之外之右學士
楊濟輩為詩紀其事然同僚相與每常朝畢本院官立
東閣前俟大學士至入閣中講讀史官皆序立園揖而

退五經博士而下揖於閣外出復序立於史館前亦園
揖揖畢各書公會乃入館修書史待宣召日昃而出公
署惟履任齋宿始一至若掌印官查公移收放俸糧則
蒞院視事按唐制翰林院在銀臺之北後復建東翰林
院於金鑾殿之西因曰鑾坡蓋隨乘輿所在而遷取其
便耳正廳曰玉堂中設視草臺每草制則具衣冠據臺
而坐後以車駕經幸不復如此但存空臺而已玉堂云
者出於道家之說李肇翰林志言居翰苑者皆謂凌玉

清遡紫霄豈止於登瀛洲哉亦曰登玉堂焉然未有榜至宋太宗乃以紅羅飛白玉堂之署四字賜之今則雖不盡符然私記往往猶曰玉堂視草用故事也

朝房

本院朝房在午門外右第六區每候朝則殿閣大學士本院學士講讀官吏官皆在焉詹事府朝房在午門外右第十八區每候朝則詹事少詹事府丞左右春坊官司經局官皆在焉鼓初嚴各詣左掖棕蓬下序坐俟鼓

終嚴而入其後本院學士候朝亦在詹事府朝房蓋以
儕輩相與之慣故也又有外朝房在長安右門外以待
漏云

史館

聖祖初建吳國重史事設起居注甲辰年十月以宋濂
為之日侍左右紀言動繼濂者王禕樂韶鳳即大位後
吳琳魏觀劉季道由明經任郭傳由翰林應奉任范常
由直學士任蔣學間鈍蔣子杰由舉人任熊鼎由考功

博士任陳敬由編修任未幾革之洪武十四年九月己丑詔復置起居注秩從七品以儒士單仲祐任焉二十四年詹同猶為起居注其後竟廢令本院史官專之每朝則立班紀事入館則載筆以從書動以為日歷書言以為寶訓永樂中王直在翰林猶從事於記注宣德後寢以廢矣今史館凡十所在東閣之右中藏列聖實錄古今書史每被命修書則本院官日聚集焉常時公會後恒扃鑰之無復載筆於其間者成化弘治中臣僚累

建言欲復起居注之舊或欲即命史官記時政於其中如宋朝政房之制皆未舉行夫世之門生故吏於其所尊事者猶編有語錄談記而矧聖明盛德大業焜耀如日星而可以無述乎在洪武時日厯寶訓常勤刪述其舊跡猶有可尋者於戲聖祖之制所當復也

印信

本院印信係銅鑄方二寸四分厚四分五釐九疊篆文其在南京者則加南京二字詹事府亦銅印方二寸七

分厚六分左右春坊司經局銅印制度俱與本院同文淵閣別有印其印銀鑄方一寸七分厚六分其文玉箸篆文也各衙門印皆用於行移中獨內閣印惟機密文宗鈐封進呈御前開拆始用之近世訛傳此印為司禮監所奪甚或形諸章奏歸咎三楊蓋不考之過一至於此

文移

本院公文凡行六部用呈三品衙門用平關應有行移

俱由該部轉行其呈關俱有定式見大明會典其他常務則用手本如官吏職役銓注給授散官勲階則行吏部俸糒則行戶部領朝參牙牌則行禮部關皂隸柴薪則行兵部之類俱用本院印若左右二春坊司經局每事惟呈行詹事府然後轉行云

序秩

本院官與詹事府坊局官多互兼職事以品秩尊卑為序若非兼職而同品秩者先書本院官然後及詹事府

坊局官如學士則序於春坊大學士及庶子之上侍讀學士侍講學士則序於諭德之上侍讀侍講則序於府丞中允之上修撰則序於贊善司直之上典籍先清紀待詔先司諫錄事通事舍人蓋亦然也此為脩書考試等事書職名而言若平居相與則惟序齒

公私聚會序坐

公朝侍坐公讌序坐本院官及詹事府坊局官皆以品級論若候朝入館閣則學士自為一類講讀官自為一

類史官自為一類皆尚齒東宮官僚亦以其類相叅尚齒亦如之見於彭時所記蓋天順以前為然其後座主門生私會皆相賓主李東陽嘗曰今之諸曹百執事各有長屬以法相視事有稟白可不可則唯唯而退以事當出立受約束於庭已輒俛首去不敢漫及他語其勢分懸絕固然莫怪也惟館閣以道德文字為事雖師保耆宿位尊而望重亦與後進之士相賓主上下論議閭閻侃侃各中其度情交而義達喜有慶行有餞周旋乎

禮樂而發越乎文章倡和聯屬疊疊而不厭所以汲引
成就之意甚厚此詞林之盛事也嗟乎勢位重則道誼
輕而獻諛干進之人至矣然則為後進者盍亦自重乎
哉

翰林記卷一

欽定四庫全書

翰林記卷二

明 黃佐 撰

殿閣大學士

洪武十五年十二月戊午倣宋制置殿閣學士以禮部尚書邵質為華蓋殿大學士翰林院學士宋訥為文淵閣大學士檢討吳伯宗為武英殿大學士典籍吳沈為東閣大學士文華殿亦設大學士是月辛酉以命耆儒鮑恂余詮張長年皆辭不拜遂以全思誠

為之永樂二十二年九月丁酉仁宗昭皇帝增設謹
身殿大學士命太子少傅楊榮兼之其序次華蓋殿
謹身殿文華殿武英殿文淵閣東閣凡六大學士至
今因之而文華殿則不常設

內閣親擢

洪武之末翰林不及十數人壬午六月太宗即位首詔
吏部及本院舉文學行誼才識之士授職始聞待詔解
縉名稍親近之召對喜其豪傑敢言益見信用七月侍

書黃淮改中書舍人入見上與語大奇之凡侍朝特命
與縉立於御榻之左以備顧問上以萬幾叢脞日御奉
天門左室每夕召語至夜分上或就寢賜坐榻前論議
幾密同列不得與聞是時吳府審理副楊士奇在翰林
充修史官亦有譽望親擢為編修已而改給事中金幼
孜桐城縣知縣胡儼為檢討尋陞縉為侍讀修撰胡靖
為侍講編修楊子榮為修撰而改子榮名榮繼又陞淮
為編修九月遂開內閣於東角門內召七人者諭以委

任腹心之意俾入處其中專典密務雖學士王景輩不得與焉明日賜織金羅衣各一襲時幾務孔殷每旦奏事退內閣之臣造宸前進呈文字商幾務承顧問率漏下十數刻始退十一月陞縉為侍讀學士靖淮儼皆侍讀榮士奇幼孜皆侍講尋復改靖名廣永樂元年九月上御右順門召縉等諭之曰朕即位以來爾七人者朝夕相與共事鮮離左右朕嘉爾等恭慎不懈皆賜五品公服二年正月七人皆賜二品織金衣且勞之曰天下

事咸朕與若等同計非若六卿之分理也三月冊立皇太子進縉為學士兼左春坊大學士奉議大夫准為左春坊左庶子廣為右春坊右庶子皆奉議大夫仍兼侍讀儼為左春坊左諭德仍兼侍讀榮為右春坊右諭德仍兼侍講士奇以本官兼左春坊左中允幼孜以本官兼右春坊右中允各賜袍笏九月儼出為國子祭酒四年縉坐事去廣遂進學士兼左春坊大學士奉政大夫五年二月淮進右春坊大學士仍兼侍讀尋進學士仍

兼右春坊大學士士奇進左春坊左諭德幼孜進右春坊右諭德俱奉訓大夫仍兼侍講十二年淮坐事去十四年四月廣進文淵閣大學士榮幼孜進學士三人仍兼春坊原職十五年二月士奇進學士仍兼春坊原職十六年五月廣卒十八年閏正月命榮幼孜並為文淵閣大學士兼學士十九年正月改士奇為左春坊大學士終永樂之世內閣之臣不過五品而華蓋等殿大學士亦不復設蓋雖不崇以穹秩然皆出於親擢寄以天

下大政而且諫行言聽得以奏其啓沃之功此所以為
儒者之至榮也英宗復辟思復永樂之舊時脩撰岳正
每開口論大事以世務自許上廉知其名吏部尚書王
翱亦薦之天順元年六月召見文華殿上遙見遽曰好
既陞陞登殿連曰好好問年若干對曰四十上曰正好
問何處人對曰潮縣上曰又是此北方人問治何經曰
尚書上曰是書經尤善問何科進士對曰正統十三年
上益喜曰又是我所取者乃顧謂曰今用汝內閣叅預

機務凡事為朕主張許彬老矣不足恃也正頓首辭至再乃出赴閣九月上御文華殿召太常少卿兼侍讀彭時入見令近榻前問曰汝是正統十三年狀元耶對曰不才誤蒙聖恩拔擢至今感戴不忘因叩頭三又曰第二名是陳鑑第三名岳正時對曰是又問今年幾何對曰臣犬馬之齒四十二上笑曰正好用出外吃酒飯去時叩頭而已命下着文淵閣辦事蓋前此未嘗無親擢者而其事弗傳觀此則列聖禮重儒臣之意赫赫猶目

前也咨詢必及其年者豈不以老成謀國必有壯猷新進少年或至敗事與用人慎始如此真可為後世之法

內閣視事坐次

殿閣大學士雖設自洪武中然同在內閣視事則自永樂初年始其坐次不敢正席者以車駕所嘗臨故也天順中大學士李賢疑與外衙門同將欲正席而坐同列彭時不可乃止時嘗記其事曰文淵閣在午門之外迤東文華殿南面磚城凡十間皆覆以黃瓦西五間中揭

文淵閣三大字牌扁牌下置紅櫃藏三朝實錄副本儘前楹設凳東西坐餘四間皆後列書櫃隔前楹為退休所李公自吏部進以傍坐不安令人移紅櫃壁後欲設公座予曰不可聞宣德初年聖駕至此故不設公座李曰事久矣今設何妨予曰此內府也亦不宜南面正坐李曰東邊食處與各房却正坐如何予曰此有牌扁故為正彼皆無扁故也李曰東閣有扁亦正坐何必拘此予曰東閣西面非正南也李詞氣稍不平曰烏有居是

官而不正其位乎予曰正位在外諸衙門則可在內決
不可如欲正位則華蓋謹身武英文華諸殿大學士將
如何耶蓋殿閣皆至尊所御原設官之意止可侍坐以
備顧問決無正坐理李語塞然意猶未已踰數日上遣
太監傅恭送範銅飾金孔子并四配像一龕來敬置於
中間又數日遣太監裴富送聖賢畫像一副來懸於龕
後壁上乃罷不設焉

叅預幾務

內閣叅預幾務雖肇自文皇踐阼之初然職惟大學士暨學士而已永樂二十二年八月仁宗繼統以文淵閣大學士楊榮等輔導東宮積有年勞於是陞榮為太常寺卿金幼孜為戶部右侍郎俱兼前職楊士奇為禮部左侍郎兼華蓋殿大學士起前左春坊大學士黃淮為通政司通政使兼武英殿大學士四人俱掌內制不預所陞職務內閣帶三品官銜始此上每退朝還宮遇有幾務須計議者必親御翰墨書榮等姓名識以御寶或

用御押封出使之規畫榮等條對用文淵閣印封入人
不得聞九月加士奇少保仍兼前職榮太子少傅兼謹
身殿大學士幼孜太子少保兼武英殿大學士內閣位
至三孤始此尊師重傅之禮至是極矣十一月士奇復
進少傅兼職如故洪熙元年正月淮進少保戶部尚書
士奇進兵部尚書幼孜進禮部尚書俱兼大學士如故
內閣帶尚書官銜亦始此是年閏七月宣宗即位罷弘
文閣命太常寺卿兼學士楊溥與士奇等同視事宣德

元年三月陞行在禮部右侍郎張瑛為左侍郎兼華蓋殿大學士九月淮致仕二年二月陞行在戶部左侍郎陳山為本部尚書兼謹身殿大學士瑛亦進本部尚書兼職如故二人者東宮舊僚也自是每新朝必晉陟侍從謂之從龍恩云然山與瑛皆不厭人望山直內閣無何被踈斥即致仕去久之瑛亦改南京禮部尚書六年十二月幼孜卒九年八月溥進禮部尚書兼職如故九月瑛起復入見上老之留為尚書兼大學士仍前銜幾

務不復得與聞英宗之嗣位也在東宮未及出閣講學故無推恩者正統元年七月瑛卒三年四月士奇暨榮俱進少師兼職如故溥進少保兼武英殿大學士內閣以實錄成進官始此五年七月榮卒九年三月士奇卒十一年二月溥卒於是老成盡矣是時侍講學士陳循進戶部左侍郎兼學士入閣叅預幾務侍讀苗衷侍講學士高穀馬愉侍講曹鼐以經筵日講官命與循同視事未幾鼐進學士又進吏部左侍郎兼學士衷進兵部

左侍郎兼侍讀學士愉進禮部右侍郎穀進工部右侍郎俱兼侍講學士愉尋卒十四年八月鴈扈從北征沒於土木之難景帝以郕王監國擢修撰商輅彭時入閣辦事及即位藩府舊僚推恩官止侍郎不得厠內閣而循穀各進本部尚書兼學士時皆進侍讀時以憂去又擢戶部右侍郎江淵兼學士入閣叅預幾務尋又以命禮部左侍郎俞綱綱在內閣三月改南京禮部去蓋朝廷欲脩文皇故事故擢用諸人然進退亦頗輕矣景泰

元年二月裴進本部尚書兼學士尋致仕九月輅進學士十一月以禮部左侍郎王一寧國子監祭酒蕭鎡各兼學士俱入閣叅預幾務尋加循少保兼文淵閣大學士穀少保兼東閣大學士仍兼尚書如故四月命循穀俱兼太子太傅陞淵一寧鎡俱太子少師輅兵部左侍郎學士兼左春坊大學士一寧尋卒十月命太子太保兼都察院左都御史王文入閣辦事外官不由翰林得叅預幾務者始此初文與中官王誠結為兄弟謀入閣

嘗私以語高穀會中旨增內閣員陳循舉蕭維禎穀遂
舉文奏上果用文人皆駭愕四年二月命文為太子太
保吏部尚書兼學士尋加少保兼東閣大學士尚書如
故七年五月改循兼華蓋殿大學士穀文俱兼謹身殿
大學士鎡進本部尚書兼職如故英宗復辟天順元年
正月命都察院左副都御史徐有貞兼學士入閣叅預
幾務有貞始名理由侍講陞任以迎復功故有是命是
日陞太常寺卿許彬為禮部左侍郎兼學士與有貞同

視事明日陞有貞為兵部尚書兼職如故詔罪謀立襄
藩者王文伏法陳循江淵謫戍蕭鎡商輅發為民蓋事
關社稷有所不得已故也又明日陞大理寺卿薛瑄為
禮部右侍郎兼學士入閣叅預幾務又數日穀致仕去
三月命吏部右侍郎李賢兼學士入閣叅預機務有貞
為奉天朔運推誠宣力守正文臣特進光祿大夫封武
功伯兼東閣大學士尋改兼華蓋殿大學士掌文淵閣
事曰掌文淵閣事有貞所自署也閣在御府大內非人

臣所可掌識者譏之矧非軍功而冒封爵固占知其不終矣尋進賢為本部尚書兼官如故五月彬瑄轉左侍郎仍兼職六月命通政司左叅議兼侍講呂原繼命修撰岳正俱入閣叅預機務有貞賢坐事左遷賢為吏部左侍郎瑄遂致仕去瑄制行純慤遂於理學其去也蓋見幾而作云七月有貞革爵遠竄彬坐黜復賢官視事如故永樂中胡儼自內閣出不復再入再入自賢始也正尋坐事去九月命太常寺少卿兼侍讀彭時復入閣

叅預機務十二月時進兼學士改原為侍讀學士二年
五月原進學士六年七月加賢太子太保八月原以憂
去十一月卒七年二月陞詹事府詹事陳文為禮部右
侍郎兼學士入閣叅預機務十一月召正還八年正月
憲宗嗣位三月復正原職不預機務加賢少保兼華蓋
殿大學士尚書如故文吏部左侍郎時吏部右侍郎仍
兼原職十月時進兵部尚書成化元年三月文進禮部
尚書二年十二月命太常寺少卿兼侍讀學士劉定之

入閣叅預機務是年賢以憂去奪情起視事尋卒三年三月復商輅原職視事如故八月文時俱加太子少保仍前尚書兼文淵閣大學士定之進工部左侍郎兼學士四年四月文卒十月輅進本部尚書定之轉禮部左侍郎俱兼職如故七年六月定之卒十一年正月時進少保三月卒四月輅進文淵閣大學士十二年六月加太子少保改吏部十三年二月進兼謹身殿大學士十四年輅致仕去加少保終成化之世又有劉珏萬安劉

吉尹直彭華弘治中則徐溥丘濬劉健李東陽謝遷正
德中則焦芳劉宇曹元王鏊劉忠楊廷和梁儲費宏靳
貴楊一清蔣冕毛紀若芳與宇元由逆瑾進者也其末
也惟廷和惟儲惟冕惟紀得奉遺詔翊新政焉以近事
尚在人耳目不復悉記夫內閣密勿之地寄以幾務即
鄒孟氏之所謂親臣也始雖以待儒彥而其後則元老
鉅寮為天下具瞻者乃得與焉非惟親臣亦重臣也百
餘年來政治之樞要實在於此國朝不設丞相而世以

宰相稱之過矣嗟乎用非其人固足以覆餗然或不見親且信焉雖有真儒安所宣其效哉

傳旨條旨

唐宋以來傳旨屬之執政故有所謂三旨宰相者若臣寮奏章凡有所批荅皆臣下代言中書省及集賢院翰林院學士專之國朝始猶設中書省丞相政事由之以出納其後革去分任五軍九卿衙門中外奏章皆上徹睿覽每斷大事決大疑臣下惟面奏取旨有所可否則

命翰林儒臣折衷今古而後行之故洪武中批答與御
前傳旨為一事當筆者所書即天語也永樂洪熙二朝
每召內閣造膝密議人不得與聞雖倚毗之意甚專然
批答出自御筆未嘗委之他人也宣廟時始令內閣楊
士奇輩及尚書兼詹事蹇義夏原吉於凡中外章奏許
用小票墨書貼各䟽面以進謂之條旨中易紅書批出
上或親書或否及遇大事大疑猶命大臣面議議既定
即傳旨處分不待批答當時公移每書曰某學士某傳

於某殿某門欽奉聖旨即孝宗謂大學士劉健曰先生輩亦傳得旨是也自正統後始專命內閣條旨然中每依違或徑由中出是時上方幼冲委政宦官王振一至於此上下蒙蔽乃及土木之難英宗復辟每事與內閣面議然後批行弘治末上攬乾綱內閣條旨多出御筆事涉重大至厘宣問幾復祖宗之舊正德時批荅大率與正統相類今之建議者徒知批荅當依內閣所條而不知有面議傳旨故事或誤以條為調和之義也審爾則

是漫無可否以聽上裁惟恐見忤矣豈所望於以道事君者哉苟利社稷死生以之可也

密疏言事

內閣密務有難颺言敷奏者太宗許密封進呈謂之密疏永樂十七年十二月乙丑學士楊榮密疏進言十事皆斥五府六部三法司積弊太宗覽而嘉之密諭榮曰汝言實切時病但汝為腹心之臣若遽進此言恐羣臣益相猜疑不若使慎密御史言之於是得監察御史鄧

真界入奏衆皆股栗免冠請罪詔諸司即日悛改怙終者不赦蓋榮所為奏留中真則受其意者也仁宗初即位兵部尚書李慶言於上曰民間馬畜蕃甚已散之軍伍尚餘數千請令朝覲官領之少蘇民力大學士楊士奇獨密奏謂朝廷求賢任官今乃使養馬而課責與民同非貴賢賤畜之意明日面請內批罷其事不報明日又入對請罷上曰吾偶忘之當即批出不爽也午刻上御思善門召諭曰批豈真忘之念卿孤立為衆所傷不

欲因卿言而罷耳今有名矣出示一章乃陝西按察使
陳智所言者命士竒據此草勅止之已領者准洪武中
官員乘例不責生息虧損不責償未給者止勿給復謂
曰繼今令有不便惟密與朕言李慶輩不識大體不足
語也二十二年十一月學士楊溥密疏言事上嘉納御
札獎諭之曰覽卿所奏為國家之計誠合朕心但望卿
始終如一知無不言相朕致治以承天休感卿忠懷特
用酬報今賜卿綵幣一雙鈔一千貫卿其領之夫機事

不密則害成上所以委曲為之處者如此而又寵以旌賞真可謂一德一心矣其後內閣言事循此例類用題奏揭帖不宣聞於外云天順癸未空中有聲大學士李賢密奏曰傳言無形有聲謂之鼓妖上不恤民則有此異因條不便於民者十事上皆從之即詔天下賢又請罷江南所造緞疋磁器清錦衣衛囚止各邊守臣進貢下番所遣使臣停中外買辦采辦上不從賢執之數次止取前十條行之左右見賢力爭皆寒心同列亦為賢

懼賢曰古之大臣知無不言今雖不能盡然至於利害
繫國家安危者豈可默默以苟祿位然上聖明亦不以
為忤也蓋嘗論之嘉謀嘉猷入告于內與颺言敷奏者
不同必利害繫國家安危而後言之又與爭一事之得
失陳一時之利害者不同內閣事功稱三楊一李然其
所遭際可考也夫惟聲色不動而誠意潛孚閱歷既多
而識見素定乃可以當此然亦難矣岳正在內閣嘗密
言吉祥石亨罪惡二人譖之被黜有士人告之曰先生

犯孔子戒矣問之云何則曰未信而諫是也正曰初上用我左右責任教誡甚至敢不盡心若子以諫官處我則恐未然夫正之言誠是也沃心之論造膝之謀初不事於表暴而天下自陰受其賜此內閣之所以異於諫官也若先朝之委任楊李真可以為萬世之法

會議

宣德以前每有政事與羣臣面議正統十年始命內閣官與六部都察院通政司大理寺堂上官六科掌印官

會議遂為例徐有貞曰景泰四年十月上以河決沙灣
久弗克治集左右丞弼暨百執事之官於文淵閣議舉
可以治水者僉以有貞應詔即其事也葉盛曰凡中外
陳奏皆禮部於內府會議禮部侍郎宣言其要諸部院
正官面決可否自正官外更無出一言者天順中罷之
近例凡朝廷有大事當會議者該部奏請如合會儒臣
則本院詹事府左右春坊司經局及國子監皆預

繕寫疏章

太宗時內閣進學者二十八人皆面稽而身教之王英
王直德罷才學尤為儕輩所推首擢為脩撰以皆慎密
可任並入秘閣書進呈機密奏疏永樂末累擢至講讀
學士蓋嘗試以為大用之地云宣宗時復增左春坊大
學士曾榮俾入直未幾榮卒二王亦出理部事繕寫章
疏之任遂廢

書辦

大明會典云凡內閣所掌制勅詔旨誥命冊表寶文玉

牒講章碑額及題奏揭帖等項一應機密文書及王府
勅符底簿皆制勅房書辦文官誥勅及番譯勅書并四
裔來文揭帖兵部紀工勘合底簿等項皆誥勅房書辦
各用中書舍人等官於本院或各該衙門帶俸遇有陞
遷仍舊供職其有堪別用者亦從吏部推舉

內閣嚴禁

祖宗規制嚴內閣之禁凡一應官員閒雜人等不許擅
入違者治罪今內閣門額懸掛聖旨葉盛云文淵閣宥

密之地外臣非公事不能至遷陞機宜無敢泄者楊文貞文定文敏三先生典型尚存文貞間遇知已或問近日外間有何事或某事便否亦甚鮮也後來者則有稍稍傳聞於人甚而方面官見辭後必造謁或舉子入考文字又甚而造膝之言代言之筆不待莫出禁門而已徧告多人矣此蓋指景泰中之用事者故云然

官員入見

凡本院官入見內閣必先使孔目通姓名而後見初授

官謝恩後入見例留飯可齋雜記云予官脩撰謝恩後偕同年陳緝熙岳季方詣閣下見曹陳苗高四先生遂留早食酒飯隨光祿寺所供不增設諸先生笑曰此是本院故事儒官清淡只如此蓋以寮友待之也其後內閣官尊或有座主門生之分遂令六品以下揖於階下五品及詹事府官送迎如寮友禮若朝見及冬至正旦行禮後不暇易服往見焉非公事不復至或議朝政質問可否使孔目請入乃入外官入見亦以公事會典所

載凡各衙門領勅官員俱赴內閣會有勅書方赴鴻臚寺報名辭朝領勅其他則國子監官送書課提督四夷館送番譯文字之類具有定規云

弘文館閣

洪武三年四月庚辰置弘文館設學士一員及校書郎等官九年閏九月定官制遂罷之居是職者劉基詹同羅復仁胡鉉也仁宗在東宮潛心問學及即位建弘文館於思善門外蓋法聖祖遺意永樂二十二年八月命

本院學士楊溥掌之與侍講王進時承顧問討論經籍
又擢編修楊敬給事中何澄俾預焉又起用檢討陳繼
凡在閣者五人上嘗臨幸講論經史不倦洪熙元年閏
七月溥等奏納弘文閣印各還原任宣宗可之仍命溥
與楊士奇等同治內閣事正德初建議者謂宜倣弘文
閣故事命侍從文學之臣更番入直或召天下之文學
而恬退者一二人如起用陳繼之例聽政之暇游息之
間特至閣中畧去威嚴從容訪問或講經書或論古今

成敗有暇則至不必拘其時有疑則問不必嚴其禮如是則聖學緝熙義理純熟凡百玩好自不暇及而所召必皆一時之聞人則亦可以收拾天下之遺才矣此亦復祖宗君臣同遊之漸也惜論建未及上徒付之空言而已

東閣儲用

正統丁卯詔選本院官之有譽望者入東閣讀中秘書修撰劉儼商輅編修陳文呂原等凡十人且命之侍經

筵日在內府進學不倦蓋儲之以待大用也其後多入
內閣為名臣者然非職掌之舊殆與庶吉士同矣

翰林記卷二

欽定四庫全書

翰林記卷三

明 黃佐 撰

薦舉

聖祖之靖元亂也干戈未定即大召四方名儒隨所在館穀之使各以其所知薦戊戌十二月辟儒士范祖幹葉儀命為諮議己亥正月克婺州分置中書省召儒士許元胡翰十餘人皆會食省中日令二人進講經史數陳治道及克處州又有薦青

田劉基龍泉章溢麗水葉琛金華宋濂者即遣使以書幣徵之庚子三月至建康入見甚喜賜坐從容與論經史及咨以時事深見尊寵既而命有司即所居之西創禮賢館以處之始置儒臺校理以官儒臣時朱文忠守金華復薦王禕王天錫至皆用之尋建尚賓館以待薦舉至者丙午年置博士廳設博士一人典籤十餘人以備顧問博士則許瑗許存仁典籤則劉秩鮑穎吳毅劉辰黃哲徐穎之屬侍從文

學職寔權輿於此及置翰林院則擢諸儒之最有文行者任焉洪武六年復大徵天下儒士浙江叅政徐本首以桂彥良薦待詔闕下奏對稱旨擢太子正字未幾浙江布政使安然等以懷遠縣教諭王景等薦既至命日直翰林隨班見賜燕西序七年學士宋濂侍上登武樓賜坐問及宿學之士濂以會稽郭傳對上索其文覽之稱善即日召見謹身殿稱旨擢應奉翰林文字十年上聞金華儒士吳沉名侍臣復薦之十月召見稱旨以為

待制十三年五月典籍戴安薦儒士楊良卿王成季劉仲海鄒魯狂編修吳沉薦儒士吳慎明教授童翼典籍吳伯宗薦儒士宋季子皆降勅召之十五年復徵耆儒隱逸侍臣張寧以宛平儒士董倫薦召至以為太子贊善大夫賜冠帶是年置諫院官十月以耆儒劉靖為諫院左司諫兼左春坊左庶子闕賢為右司諫兼右春坊右庶子趙肅為諫院左正言兼左春坊左諭德何顯周為右正言兼右春坊右諭德十七年七月下詔徵賢耆

儒汪仲魯至自婺源司禮司引見上舉西伯戲黎篇命之講釋稱旨授左春坊左司直郎又數日劉三吾至自茶陵入見上喜其莊重宏博甚禮重之即拜左春坊左贊善未幾擢本院學士十八年三月開進士科始定進士入翰林之制自此薦舉者乃不輕授云永樂初本院員少上命侍臣更薦引之於是首薦擢審理副楊士奇為編修繼擢儒士曾日章為侍讀助教鄒緝為侍讀改給事中金幼孜王洪桐城縣知縣胡儼為檢討應天訓

導王汝玉蕪湖訓導張伯穎為五經博士皆異數也自
後惟於進士及庶吉士內擢用宣德七年大學士楊士
奇薦交趾南靈州知州黎恬文學操行可任近侍遂拜
右春坊右諭德恬既至不副輿論江西人在翰林者或
咻之乃求歸其鄉自是薦舉進者益罕矣天順二年忠
國公石亨大學士李賢交薦撫州處士吳與弼召以為
左春坊左諭德固辭不拜成化十八年廣東布政使彭
韶巡撫兩廣都御史朱英交薦新會舉人陳獻章既至

吏部欲試之以疾辭自陳患病乞歸侍養詔授檢討
親終病愈仍來供職獻章即與弼門人也後累被薦皆
被詔不行二人者皆以理學鳴於時隱居求志天下高
之竊謂科目未足以盡天下之賢才矧巖居川觀抱道
不售與就試有司而屢黜者豈無其人乎薦舉之典誠
不可廢也

進士銓注

洪武初年本院官皆由薦舉進四年辛亥雖設進士科

未有入翰林者十八年三月丙子以第一甲賜進士及第丁顯練安黃子澄為脩撰第二甲賜進士出身馬京齊麟等為編修吳文等為檢討皆出簡用不由選法命下吏部惟銓注而已後遂為例二十一年策進士以第一人任亨泰為脩撰第二人唐震第三人盧原質為編修著為令至今因之二十四年則許觀張顯宗吳言信二十七年則張信景清戴德彝三十年則陳邨尹昌隆劉諤是年六月覆試則韓克忠王恕焦勝革除庚辰科

遵洪武乙丑之例第一甲胡廣王良李貫皆修撰第二
甲吳溥楊子榮楊溥劉現皆編修永樂二年進士第一
人曾榮擢修撰第二人周述第三人周孟簡仍皆編修
則復遵戊辰之令也四年林環陳全劉素九年蕭時中
苗衷黃暘十年馬鐸林誌王鈺十三年陳循李貞陳景
著十六年李騏劉江鄧珍十九年曾鶴齡劉矩裴綸二
十二年邢寬梁禔孫曰恭宣德二年馬愉杜寧謝璉五
年林震龔錡林文八年曹鼐趙恢鍾復正統元年周旋

陳文劉定之四年施槃楊萬倪謙七年劉儼呂原黃諫
十年商輅周洪謨劉俊十三年彭時陳鑑岳正景泰二
年柯潛劉昇王俱五年孫賢徐溥徐轄天順元年黎淳
徐瓊陳秉中四年王一夔李永通鄭環八年彭教吳鈇
羅璟成化二年羅倫程敏政陸簡五年張昇丁溥董越
八年吳寬劉震李仁傑十一年謝遷劉戡王鏊十四年
曾彥楊守陞曾追十七年王華黃珣張天瑞二十年李
旻白鉞王敕二十三年費宏劉春涂瑞弘治三年錢福

劉存業靳貴六年毛澄徐穆羅欽順九年朱希周王瓚
陳瀾十二年倫文叙豐熙劉龍十五年康海孫清李廷
相十八年顧鼎臣董玘謝丕正德三年呂柟景暘戴大
賓時大學士焦芳用事第二甲第一人焦黃中芳子也
有中旨以黃中及第三甲胡纘宗俱為檢討及黃中之
敗也纘宗亦坐貶六年楊慎余本鄒守益九年唐臯黃
初蔡昂十二年舒芬倫以訓崔桐十六年楊惟聰陸鈇
費懋中蓋自永樂以來進士得銓注者惟第一甲而二

甲三甲必改庶吉士乃得銓注云

庶吉士銓法

庶吉士之選始自洪武十八年乙丑上以諸進士未更事欲優待之俾觀政於諸司俟諳練然後任之其在本院承敕監等近侍衙門者采書經庶常吉士之義俱改稱為庶吉士其在六部及諸司者則仍稱進士云是科本院庶吉士則陳洪等吏科則楊靖等戶科則郭資等禮科則徐旭等然其詳則不可考矣二十一年可考者

惟解縉黃金華為中書吉士永樂二年因之本院庶吉士取數十人擇二十五人暨首甲三人俾進學內閣周忱自陳願與其列遂增忱二十九人命學士解縉領其事上親教之五年丁亥首擢王英王直為編修十年壬辰又擢羅汝敬余鼎彭汝器為編修余學夔為檢討楊相劉欽章敞陳敬宗沈升李時勉段民倪維啓吾紳楊勉等俱刑部主事蓋上意欲作養積久因其成材次第擢用然急於進者或舛望焉故相等皆除刑部四年丙

戊庶吉士陳孟潔曾春齡輩卒於京師或以教習已近
十年為言上怒於是張叔穎等皆除府通判九年辛卯
二甲庶吉士錢習禮陳璣黃壽生陳用劉永清等教習
未久皆擢檢討十年壬辰庶吉士方復等擢除莫考十
三年乙未庶吉士王翺擢大理寺左寺正宋琰鄭雍言
高穀張益俱中書舍人黃仲芳等授知縣惟曹義授編
修許彬劉麟應連智授檢討十六年戊戌庶吉士周叙
董璘習嘉言楊珙尹鳳岐陳詢俱授編修餘皆授諸司

官有差十九年辛丑二十二年甲辰不可考宣德中合
三科進士選入翰林為庶吉士者二十八人蕭鎡薩琦
賴世隆吳節江淵徐珪林補授編修王玉王振姜洪李
紹何瑄授檢討董鏞等授知縣是年猶有選入六科近
侍諸衙門者正統元年丙辰庶吉士王鑑等十四人除
擢莫考自是以後始定庶吉士止入翰林然四年七年
十年進士皆不選至十三年戊辰始純選北方及蜀產
者二甲萬安劉吉劉珣李泰授編修三甲邢讓李本授

檢討尹旻等授給事中監察御史王恕授大理寺評事
景泰二年二甲吳滙周輿戚瀾劉宣楊守陳王獻童緣
授編修三甲張業江朝宗授檢討劉清等授給事中五
年二甲丘濬彭華牛綸扈直授編修耿裕等授給事中
三甲陳政等授御史天順四年二甲張元禎汪諧劉健
授編修三甲周經鄭紀張頤授檢討八年二甲李東陽
倪岳焦芳陳音謝鐸授編修三甲傅瀚張泰吳希賢授
檢討成化二年三甲林瀚章懋李傑黃仲昭宋應奎商

良臣授編修三甲莊景授檢討四年二甲費閭戶龍喬
維翰王臣授編修十四年二甲梁儲張深楊傑教山劉
中于材徐鵬鄧焮江瀾馬廷用授編修三甲劉機張芮
楊廷和楊時暢武衛授檢討庶吉士之留官在翰林者
至是盛矣二十三年二甲程楷蔣冕黃穆傅珪華巒吳
儼羅玘蘇葵授編修三甲李遜學石珪毛紀授檢討弘
治六年二甲顧清沈燾吳一鵬汪俊周玉黃瀾授編修
三甲薛格授檢討九年二甲濮韶陳霽葉德賈詠授編

修三甲汪偉王九思劉瑞授檢討十五年二甲魯鐸溫
仁和李時滕霄畢濟川何瑋授編修三甲周禎盛端明
授檢討十八年二甲崔銑嚴嵩湛若水陸深翟鑾徐縉
授編修三甲段炅穆孔暉孫紹先易舒誥張邦奇授檢
討正德三年二甲第四人劉仁宇之子也逆瑾傳中旨
併其上二名邵銳黃芳及第三甲李志學韓守愚凡五
人為庶吉士數月即拜銳芳仁為編修瑾敗仁黜銳芳
皆坐累左遷云六年二甲許成名劉棟張璧應良尹襄

劉朴費案張潮王思孫承恩劉泉林文俊孫紹祖授編
修三甲金臯吳惠郭維藩王元正陳寰張衍慶邊憲授
檢討十二年二甲汪佃余承勛黃易江暉劉世盛葉桂
章葉式馬汝驥王三錫陳沂鄭灝授編修三甲張星蕭
與成林時季方湯惟學授檢討二科庶吉士留用之多
前此所未有也十六年二甲廖道南江汝璧童承叙黃
佐王相王同祖王用賓授編修蓋自宣德以前兼授部
屬中書等官正統間始有授科道者成化後不授中書

正德辛未丁丑止授科道而無部屬辛巳乃復兼授焉
祖宗時最重是選雖二甲第一人及禮部第一人或選
而不預或預而不留其嚴如此丘濬嘗謂每科不必多
選所選不過二十人每選不必多留所留不過三五輩
其言誠是也然必有通融之術而後可以免遺材之嘆
文皇帝之久於教習也蓋欲盡使之積學以待問蓄德
以充位而後已未嘗遽出之前輩謂翰林官惟首甲即
除授選為庶吉士者遠則八九年近則四五年而後除

授有不堪者乃改授他職世以職清務間稱翰林為玉
堂仙好事者因稱一甲三人為天上生仙餘為半路脩
行亦切喻也觀此可見今公署教習不過三年即評品
而去留之使有晚成者出乎其間曷由進哉竊謂當體
文皇帝之意該授科道部屬等官有志進學者許自陳
願就近侍他職如高穀輩授中書舍人之例穀後以學
行獨優陞司直郎遂入翰林為侍講宜著為令庶使華
國之儒不至有遺而祖宗之制因可復也

纂脩擢用

洪武六年十二月以儒士朱右趙壘朱濂孫作為編修以纂日歷故也作辭不拜明年五月日歷始成云纂修擢用蓋自此始洪武末年充修史官者有教諭等官王景高讓具勤趙友士端孝思張秉彝唐畊葉惠仲胡仲昭等景即拜侍讀餘各除主事及王府官永樂初修高廟實錄成以太常寺博士錢仲益知縣楊觀梁潛王褒為修撰國子助教王達給事中朱紘為編修行人蔣驥

為檢討國子博士金玉鉉為五經博士晉府伴讀蘇伯厚為侍書教諭解榮劉宗平為待詔謄錄生員金寔為典籍亦有京職擢為外任及止改本職者皆上所裁故也迨重脩高廟實錄及脩四書五經性理大全永樂大典等書成主事李時勉陳敬宗等擢侍講等官有差其後纂修擢用者主事劉球陳叔剛改侍講御史邵宏譽改編修然或不擢入翰林者亦多自是纂修專用本院官此例遂廢

擢用孝德

洪武二十六年八月上聞浦江鄭氏累世同居家範惟
篤倫理里人王氏效之思選用以風勵天下乃徵二
家子弟年三十以上者詣闕既至令自推舉乃以鄭濟
為左春坊左庶子王懃為右春坊右庶子徐州民權謹
十歲喪父哀毀幾絕洪武中以薦知樂安縣進光祿寺
署丞迎母就養母疾籲天求以身代母年九十卒負土
成墳廬墓三年哭泣不輟事聞召拜文華殿大學士洪

熙元年三月也謹固辭不稱朝廷不允欲以風勵天下之為人子者尋改通政司右叅議致仕仍旌其門曰孝行云詩有之曰有馮有翼有孝有德以引以翼祖宗之用賢蓋本乎此後之官近侍者動以文墨自矜炫或罔脩於家庭獨何心哉

擢用直諫

洪武十五年二月以福建儒士沈士榮為待詔士榮抗疏言天下事謂當修德省刑且請給筆札條列事宜或

入侍左右劇論庶事上以其鯁直賜手詔褒諭之故有是命十六年十月秀才周煥奎高孟文入見召對時事剴切上大喜皆擢為檢討二十六年十一月天下學職入覲者咸命侍朝或試文辭詢問經史及民間政事得失在列者多應對不稱旨獨秦州訓導門克新敷奏亮直擢左贊善紹興府學教授王俊華以善文辭擢右贊善召二人謂之曰吾所以左克新而右俊華者重直言故也皆悚然悅服他日侍臣李思迪馬懿顧問默默則

黜之嗟乎聖祖之詒謀遠矣

擢用耆俊

太祖嘗曰古之老者雖不任以政至於詢咨謀謨則老者閱歷多而聞見廣達於人情有可資者故洪武中多擢老成之士官以本院及為東駕輔導時耆儒劉靖關賢為庶子趙肅何顯為諭德世擬諸四皓學士劉三吾文淵閣大學士朱善左司直郎汪仲魯皆年踰六十時承顧問翊贊東宮趨朝則同班賜坐則聯席衣冠儼雅

修潔人望而敬之時稱翰林三老洪武十九年七月詔
舉經明行脩練達時務之士年七十以下者郡縣禮送
京師上曰比來有司不體朕意士有耆年便置不問豈
知老成古人所重文王用呂尚而興穆公不聽蹇叔而
敗伏生雖老猶足傳經豈可槩以耄而棄之也若年六
十以上七十以下者當置翰林以備顧問太祖之詒燕
如此故百餘年來任用老成臻於至治有非前代可及
者

徵聘隱逸

處士吳與弼之見薦也天順元年十月上遣行人曹隆
賫詔起之勅有曰渴望來儀以資啓沃二年五月壬寅
至京師上詔大學士李賢問曰與弼授以諭德何如對
曰可然諭德有左右上曰與之左遂授左春坊左諭德
與弼上疏固辭上召入文華殿從容顧問尋遣使賜紗
羅羊酒柴米有旨朝廷久聞高誼特用徵聘今惠然遠
來朕甚嘉悅然幣以將誠官以命德禮非過也不允所

辭或勸就職與弼曰淺陋之學衰病之軀豈堪任使敢竊祿哉再疏辭有旨固知本心不干祿仕亦不煩以冗務特處以官僚之職不必再辭戊申大學士李賢請旨召入內閣講中庸已酉二疏辭且請閱中秘書有旨固辭雖得難進之義揆之中道無乃過乎欲觀秘書可勉就職丙辰令其子璵赴吏部告疾七月庚寅四疏終辭奉旨既年老有病不能供職准辭丙申進封事十策一曰崇聖志二曰廣聖學三曰隆聖德四曰子庶民五曰

謹教令六曰敦教化七曰清百僚八曰齊庶政九曰廣
言路十曰君相一德同心己未召入文華殿上眷注無
已丁寧纂修書籍賚以銀幣給以月廩復遣行人王惟
善送歸仍賜詔褒嘉示以拳拳至意與弼既辭上令中
官傳旨勅惟善曰天氣近寒吳與弼年老一路好生看
顧莫教他費力聖主褒賢之盛節大臣推賢之盛舉於
是乎至矣

錄用聖賢後裔

洪武六年四月孔子五十五世孫孔克表以學行舉入見上與語經史皆稱旨拜修撰兼國史編修官永樂以後累舉象賢世祿之典顏子孟子周子程子朱子後裔擇宗子以聞皆授世襲五經博士惟居鄉給俸以奉祭祀而已景泰時誠意伯劉基後裔亦援此例得世襲五經博士弘治中孔子嫡派在浙江衢州者有司以宗子孔彥繩奏聞詔授世襲五經博士尋改劉基之後為指揮於是崇道酬勲之意始昭然矣

任子

洪武九年六月上謂學士承旨宋濂曰朕以布衣為天子卿亦起草萊列侍從為開國文臣之首俾世世與國同休戚不亦美乎趣令取子孫官之屢辭謝不敢有詔不允遂徵冢子瓚之子慎為殿廷儀禮司序班未幾復召仲子璲除中書舍人上時政暇輒命題試璲與慎而戒勅之上笑與濂曰朕為卿教子孫濂或奏事久稱倦上命璲慎共扶下殿父子祖孫三世皆官內庭當世以

為異事後復錄濂之孫懌為本院侍書云永樂中學士
胡廣卒詔以其子種為檢討累選至修撰洪熙時尚書
兼詹事金忠之子達擢檢討以乏文學賜歸依親讀書
正統末改給事中尚書王直之子積亦蔭檢討大學士
楊士奇楊榮則皆蔭尚寶丞及中書舍人自是遂為定
制無任翰林者孝宗眷注大學士丘濬輩官其後多至
三四人皆出聖意然或有援以陳乞者矣獨宣德中大
學士金幼孜疾革士奇榮問之惟言受國家恩重上無

益朝廷下無益生民復何言傍或啓之請身後之澤者則正色曰為子弟求祿君子所恥此其最可稱者也

改擢

本院官祖宗時不輕改擢學士官雖五品序秩於尚書之上洪武三年七月丙申以太常寺卿魏觀為侍讀學士六年四月丙辰以兵部尚書樂韶鳳為侍講學士吏部尚書詹同為學士承旨仍兼吏部尚書八年三月以廣西按察司僉事答祿與權為修撰十三年五月癸丑

以山西右布政趙新為修撰十五年十一月戊午以禮部尚書邵質為華蓋殿大學士十六年十月以僉都御史茹太素為檢討瓊州府知府趙瑁為諭德三十四年九月以左僉都御史凌漢為左贊善蓋本院自革承旨之後為五品衙門在外庶寮以學行著聞而超擢者品秩大都由尊改卑蓋崇儒右文之體當如是也永樂初進太祖實錄列纂修官職名猶先學士王景而後及禮部尚書李至剛其尊重可知曾榮以狀元及第事太宗

將二十年始得侍講學士上顧左右謂曰曾榮與學士
矣意猶謂其得之早也然則庶寮之改擢詎可輕哉是
時燕邸左長史金忠不得厠名翰林惟拜工部右侍郎
宣宗雖擢陳山張瑛入翰林以嘗為詹事府舊寮之故
也未久即斥去景帝興自邸邸其左長史儀銘亦官止
禮部左侍郎未有遽擢為學士者其後一日拜六學士
時人以為名器之濫兵部尚書陳汝言謂人曰昔十八
學士登瀛州今六學士同登何謂多邪此景帝之治所

以不終也竊謂慎重名器當自本院始葉盛所著水東日記蓋備紀之

兼職

本院官始惟與詹事府左右春坊司經局互兼職事洪武中未設編修時多以修撰兼國史編修官其後以修撰任亨泰為詹事府少詹事兼修撰則東宮官兼本院官之始也文華殿大學士全思誠兼左春坊左中允則學士兼宮寮之始也凡宮寮必俟儲位既正而後設然

必互兼無有專任者仁宗御東駕始以尚書蹇義金忠
兼詹事府詹事尚書李至剛兼左春坊大學士學士解
縉兼右春坊大學士以至侍讀楊士奇等兼中允皆本
太祖設官之意也洪熙以後始有三孤及太子三師三
少六部尚書侍郎通政司太常寺卿少卿尚寶司卿兼
本院官者正統以後始有都御史大理寺卿通政司叅
議兼本院與殿閣官者若詹事府詹事或不設而以尚
書兼學士掌之左右諭德及司經洗馬或兼講讀或兼

修撰編修或兼校書等官惟上所命而已成化以後內閣止用吏戶禮三部兼職若左諭德則兼侍讀右諭德則兼侍講之類一定而不易則自弘治時始正德中詹事府左右春坊司經局等官通無一員百餘年來所未有也坊局諸印皆寄之本院本院學士又缺有一人帶管二印者蓋逆瑾與奸芳主之大學士李東陽嘗曰旁觀坐視不能救正咎有所歸正指此也然則東駕宮寮固不可缺然必用本院官兼之而後不失祖宗之制

欽定四庫全書

翰林記

三

翰林記卷三

欽定四庫全書

翰林記卷四

明 黃佐 撰

文華堂肄業

洪武六年開文華堂禁中以為儲材蓄德之所鄉
貢舉人至京師詔免會試擇年少俊異者俾肄業
其中正月甲寅有司以河南第一人張唯等名上
召見便殿親命題俾賦詩詩成稱旨唯及王輝李
端張紳皆擢編修蕭韶為秘書監直長賜帶冠衣

服又明日以山東第三人王璉等見召試如之璉
及張鳳任敬馬亮陳敏皆擢編修賜予之受命入
堂讀書詔詞林名臣分教之太子贊善大夫宋濂
太子正字桂彥良等與馬上謂曰昔許魯齋諸生多
為宰輔卿其勉之于是聽政之暇輒幸堂中取其文
親評優劣命光祿寺日給酒饌每食皇太子親王迭
為之主唯等侍食左右冬夏賜衣時賜白金弓矢鞍
馬寵錫甚厚濂輩雖司啟迪顧諸生皆上所親教不

敢以師道自居一日侍燕間詢及肄業孰進益濂對曰
無如張唯者因備述其雋才請錄為弟子員上笑而許
之蓋同時進者凡十有七人又選成均之秀入武英堂
俾練習政事方徵彭通宋善王惟吉等皆拜給事中禮
遇雖不及唯等然侍從車駕應制備顧問未始異也其
後多至執政有聲光云

文淵閣進學

永樂三年正月壬子先是太宗命學士兼右春坊大學

士解縉等新進士中選材質美敏者俾就文淵閣進學至是縉等選修撰曾榮編修周述周孟簡庶吉士楊相王訓王直吾紳彭汝器劉子欽余學夔童朴盧翰熊直王道羅汝敬沈升柴廣敬王英全鼎楊流洪順段民楊勉章敬李時勉倪維哲陳敬宗袁添祿二十八人入見上諭勉之曰人須立志志立則功就天下古今之人未有無志而能建功成事者汝等簡拔於千百人中為進士又簡拔於進士中至此固皆今之英俊然當立志遠

大不可安於小成為學必造道德之微必具體用之全
為文必並驅班馬韓歐之間如此立心日進不已未有
不成者古之文學之士豈皆天成亦積功所至也汝等
勉之朕不任爾以事文淵閣古今載籍所萃爾各食祿
日就閣中恣爾玩賞務實得於已庶國家將來皆得爾
用不可自怠以孤朕期待之意時庶吉士周忱自陳年
少願進學上喜曰有志之士也命增忱為二十九人遂
命司禮監月給筆墨紙光祿寺給朝暮膳禮部月給膏

燭鈔人三錠工部擇近第宅居之且命縉領其事數召至便殿問以經史諸子故實或至抵暮方退五日一休沐使內臣道之校尉備駟從人莫不歆其榮艷上時搜奇書僻事以驗所學祭等多對誦如流上甚喜之多所獎賚恒顧羣臣曰秀才輩性子直可親近縉嘗以鍾山蟠龍詩試諸人甚稱彭汝器所作一日上問捕蛇者說汝器即朗誦於前上奇其才王訓以大江遶金陵賦進上最稱之且程試課業大嚴賞罰之典而王英王直尤

為儕輩所推讓云蓋是時庶吉士隸本院者尚多如孫子良洽順李昌祺蕭省身江鍊張宗璉田忠等無慮數十人皆不得與其與者皆被選者也後上嘗親征廵狩雖有庶吉士之選詔如甲申例車駕不及親莅焉宣廟末年銳志儲材合臨御以來三科進士數百人拔其尤者凡二十八人以應二十八宿時癸丑丙辰諸進士發各衙門觀政或既奉使出外矣詔追還選之皆入文淵閣進學其優禮給賜一循永樂甲申之制仍賜御製詩

以示勸勵

東閣進學

景帝興自藩邸議者謂與太宗同故在御恒思復太宗之舊景泰二年詔選庶吉士并首甲柯潛等二十八人命進學於東閣賜居第給大官酒饌及膏燭紙費命內閣大臣典領之蓋不別立師不出就外公署一如永樂初科故事然車駕未嘗親蒞教也五年亦選庶吉士暨首甲孫賢等十八人遂遵正統時例矣

公署教習

庶吉士在外公署教習始自正統初年大明會典云凡庶吉士內閣奏請學士等官二員教習本院仍行戶部給燈油錢兵部撥皂隸刑部給紙劄工部撥房屋順天府給筆墨光祿寺給酒飯內閣按月考試俟有成效送吏部銓注本院并除各衙門職事竊謂庶吉士教習寢與文華堂文淵閣時舊規不同其所撥給第虛應故事耳本院不以上請朝廷曷由知之自今宜依祖宗時入

禁中侍燕屢承顧問上以儲才蓄德而為教則下亦必
涵養進脩而自勗不惟人才造就而君德贊輔有攸賴
焉若不得已就外教習領其事者宜奏請專使校讐中
秘書日令有所撰述以為九重之獻暇則演習經筵講
章日久與之討論古今商確經史同異得失且究竟名
理歸諸身心以行誼相砥勵務得真儒以為國家之用
若其學業高下宜默識之其或求見邀名則斥而退之
勿收匪人以招物議則非惟育材有成效抑亦奉祖宗

之遺訓也苟舍大綱而先末藝以詩文記誦為學而道德政學則忽棄焉授受之際既近於學究而乃設會簿稽勤惰惟嚴聲厲色以督責之亦淺乎哉其待士矣正統以來在公署讀書者大都從事詞章內閣所謂按月考試則詩文各一篇第其高下俱揭帖開列名氏發本院立案以為去留之地致使卑陋者多至奔競有志者甚或謝病而去不能去者多稱病不往將近三年則紛然計議邀求解館最可笑也弘治癸丑學士李東陽程

敏政教庶吉士至院閱會簿悉注病假而去乃賦一絕
云回廊寂寂鎖齋居白日都消病歷餘竊食大官無寸
補綠陰庭上看醫書其流弊一至於此又聞之前輩云
天順甲申庶吉士次年相率入內閣求解館大學士李
賢謂曰賢輩教養未久奈何遽欲入仕計禮抗聲對曰今
日比永樂時何等教養且老先生從何處教養來賢稍
責之即曰吾輩教習雖例該三年已燒却一年矣謂癸
未春闈災故也賢怒甚明日請旨各授職罰禮觀政刑

部又數月拜南京刑部主事禮之言雖近不恭然不可謂無稽者觀此則教法不復祖宗之舊其能服英俊之心乎作人秉鈞者宜加之意

庶寮召試

聖祖時南昌縣學訓導朱善以學行聞本府以名上於朝陞教授洪武八年起取天下教職曾被薦擢者赴京師上廷試之擢善第一除修撰十六年十月東昌府學教授馮獻考最召試稱旨除左贊善二十年十一月戊

子以河南府學訓導葛鈞為侍講學士鈞學行著聞上
召試之果不謬故有是命三十年六月召試行人司副
陳性善行人陳成稱旨皆擢檢討他如傅藻袁渙睢稼唐
肅等擢應奉孫蕢等擢典籍皆起自州縣庶寮召試云
壬午太祖聞桐城知縣胡儼有文學召試之稱旨改除
檢討仁宣以後無聞焉惟正統四年進士錢溥由楷書
得為檢討自云召試非其實也

文華殿考藝

永樂中召試庶吉士文藝多在文華殿宣德八年冬宣宗御文華殿召諸庶吉士詣文淵閣試以諸葛孔明可與興禮樂論親第其高下取十三人翰林以徐瑾為首賜寶鏹百錠餘有差蓋因永樂之舊也已而別選尹昌等六人蕭鎡等二人及齋宮所選者八人以足二十八人之數時多需次於家及在諸司觀政俱得召試云正統元年詔以前二十八人分等第官中外復宣德故事於新科進士百人中選十四人補其處而考藝則大臣

司之自是遂為例

齋宮考藝

宣德五年三月詔取庶吉士三十人分隸近侍諸衙門如洪武乙丑之制次日引入齋宮御試與進士九十七人命題出取士何以得真材論止選八人入翰林薩琦為首次第皆上親裁在前列者賜白金五兩紵幣五十緡餘有差其隸六科為庶吉士者有廖莊之屬楊寧等令歸鄉讀書至八年復合前後科進士二十八人入翰

林焉正統後庶吉士止隸翰林然考藝出於當宁者自是罕矣

幼童教習

會典云凡各處舉到幼童奉旨送本院讀書習字者月給米食內閣稽考課業俟有成效奏請擢用其願科舉出身者聽按奇童被薦入翰林讀中秘書者始自英宗朝兵部尚書程信之子敏政後以本院秀才中順天府鄉試第二名成化丙戌進士及第第二人繼而雲南奇

童楊一清亦以薦為本院秀才中成化辛卯順天府鄉試高等明年登進士第成化末崇仁洪鍾七歲善書有司以奇童薦憲宗召見嘉嘆命入翰林充秀才讀中書書弘治己酉中順天府鄉試第六明年舉進士授中書舍人時年十八云

選充秀才

秀才之選始自太祖時然未始隸翰林也英宗時始選奇童及善書者充本院秀才天順時有姜立剛之屬

俸糧

凡本院官吏及帶俸官俸糧舊於禮部帶支後奏准本院自行收支學士正五品月支米十六石歲該一百九十二石侍讀學士侍講學士從五品月支米十四石歲該一百六十八石侍讀侍講正六品月支米十石歲該一百二十石修撰從六品月支米八石歲該九十六石編修正七品月支米七石五斗歲該九十石檢討從七品月支米七石歲該八十四石五經博士正八品月支

米六石五斗歲該七十八石典籍從八品月支米六石
歲該七十二石侍書正九品月支米五石五斗歲該六
十六石待詔從九品月支米五石歲該六十石其內閣
大臣隨所帶職銜支俸不在此例洪武中俱給全俸其
後始有折色永樂十九年以行在衙門裁革令隨從在
京官員一品至五品三分米七分鈔六品至九品四分
米六分鈔而本院官有被特恩全支本色者二十年始
定每司給米一石於折鈔內扣除餘以椒米折鈔若南

京翰林院官吏俸糧與本院同宣德六年始有折絹之
令七年始有贓罰庫物件折俸之令正統七年始定仍
給本色之令天順元年始定照舊於南京本色之令七
年始定折絹為四月五月之數成化四年令折色俸錢
鈔兼支三分鈔四分錢錢二文准鈔一貫十六年折俸
錢折支三梭布每一疋折米二十石弘治十年始定三
分四分本色俸自後每石折銀七錢而凡在任患病三
月者住俸公差無家小者明白開報回日補支詹事府

春坊司經局官吏俸糧景泰三年始令於本衙門收放
詳見會典

供需

會典云凡內閣官光祿寺日逐給料物撥厨役製造酒
飯司禮監撥匠作裝製書籍紙劄工部輪撥班匠供役
本院官酒飯俱於光祿寺支給宣德以前講讀史官歲
撥班匠一名其後寢凡內閣合用筆墨及雌黃硃墨俱
於司禮監關給紙劄本監及刑部關給木炭惜薪司及

工部關給南京翰林院合用匠役於南京工部撥給詹事府合用紙劄每月於刑部關給筆墨印色順天府買辦送用若食鹽每日例支一觔乃祖設各衙門以來常例本院該吏於各官處先各領銀三錢送戶部折鈔謂之扛擡費

兼職支俸

國朝設官有兼職者如本院學士承旨兼吏部尚書之類其俸皆二職兼支洪熙初元楊士奇黃淮楊榮金幼

孜皆以三孤或太子三少兼尚書及大學士三俸例皆兼支始士奇固辭尚書不拜上厲色曰黃淮楊榮金幼孜皆三職卿獨二職人將謂何卿勿辭因請辭俸上曰卿於朕勞勤二十年故賜以此祿何用辭士奇曰尚書月俸六十石可養壯士六十人臣受二俸已過分安敢復加時尚書蹇義在側言宜聽士奇辭學士俸士奇言辭祿當辭厚何用取虛名上曰朕成卿志及聽辭顧義謂曰廉貪之風士奇有焉於是黃淮亦辭戶部尚書俸

其後內閣大學士帶銜三孤仍兼太子三師與尚書凡四俸兼支或止支二俸用士竒故事也其本院官與詹事府坊局互兼職者支俸或兼或否悉取自上裁

分俸養親

洪武四年詔許中外官員有父母者分俸於原籍供奉養仁宗即位詔復因之遂為令時大學士黃淮父性進封少保奏請分俸於鄉如例上從之宣德初侍講學士王英奏乞分俸養母於家上亦從之自是多所祈允不

能悉記

辦事帶俸

本院辦事帶俸官以書辦為職起自內閣三楊用事時於制詔制勅二房聽用多由秀才儒士譯字生舉任始授鴻臚寺序班稍遷至中書舍人陞授大理寺卿正寺副評事尚寶司卿少卿司丞太常寺卿少卿寺丞各部左右侍郎郎中員外主事等職至三品而止獨華亭沈度善書馳聲永樂時自典籍累遷學士景泰中中書舍

人趙昂陞編修進通政司叅議為特異其後亦有由官
生及舉人進士入者弘治中林章官至三品遇恩加勲
階至榮祿大夫前此未有也

吏役

本院司吏一名由在外州與縣司撥詹事府令史二名
由在外府司吏撥左右春坊司吏各一名經局司吏一
名其由撥俱與本院同辦事舊制以三年為限後遞減
至二年若急辦撥與本院及詹事府坊局各官者不限

在外府州縣司典或多至五六人以一年為限有互相借用者其在內閣則又益多矣庶吉士及本院辦事帶俸官每員止撥一名

皂隸

皂隸之役出自兵部撥送宣德間令隨從皂隸係不願應當者每名月辦柴薪銀一兩說者謂出於大學士楊士奇所建議正統間定五品六品四名七品至九品二名內本院編修檢討中書舍人係近侍官各加一名本

院譯字官一名其後奏准庶吉士欽與一名本院直堂
十五名詹事府左春坊直堂各八名右春坊直堂五名
司經局直堂六名詹事府主簿廳直廳一名制勅房看
朝房皂隸四名若內閣大臣則隨所帶銜撥與非復本
院例也成化初修撰羅倫獨不受皂隸柴薪銀嘗論咎
楊東里之失或謂出自君命受之無害於義然或有署
印互爭直堂至成隙者有之其視倫賢不肖抑又遠矣

輿馬

本院官皆乘馬遷至三品例乘肩輿獨掌署南京院印者與三品同蓋舊規也前輩質朴庶吉士多步行或有乘驢者若途次相遇洪武中學士遇公侯引馬却避四品引馬側立三品分道而行永樂以後本院雖六品以下官惟前輩在內閣官尊者引馬側立餘舉手而已成化中有史官遇尚書為所呵內閣聞而使人讓之謝過乃已蓋本院職雖卑而倚任則重故與公卿抗禮而不避自太宗時始也雖然行脩名彰足為輿衛誰敢侮之

若過自貶損怯媚權勢則不可爾

翰林記卷四